

**Naalakkersuisut innuttaasut nunaqarfinni isorliunerusunilu najugaqartut nammineerlutik illuliornissamut taarsigassarsisinnanissaminnut periarfissaat pitsanngorsarumallugu kiisalu nammineerlutik illuliornissamut taarsigassarsinissamut periarfissaannik ammaasseqqinniarlugit suliaqarnissaannut peqquneqarnissaannik siunnersuut. Suliaq naammassineqariissaaq UPA 2024-mut.**

(Ineqarnermut Attaveqaasersuutinullu Naalakkersuisoq)

### **Akissuteqaat**

(Ineqarnermut Attaveqaasersuutinullu Naalakkersuisoq)

### **Aappassaaneerpeqarnera**

Aallarniutigalugu Naalakkersuisut sinnerlugit ataatsimiititaliaq siunnersuut peqqissaartumik suliarisimammagu qutsavigerusuppara.

Naalakkersuisut naammagisimaarlugu paasivaat ineqarnermut suliassaqarfimmi aningaasalersuinermit aaqqissuussinerit nalilivigineqarnissaat annertuumik tapersorsorneqartoq, ilanngullugu sanaqateqarluni illuliornermut aaqqissuussineq maannakkut atuuttoq.

Sanaqateqarluni illuliornermut aaqqissuussinermi taarsigassarsiarititat kiisalu taarsigassarsiat utertillugit akilerneqartarnerat pillugit aalajangersakkat innuttaasunut paasiuminarnerulersinnissaat sulissutigineqartariaqaraluartoq, ataatsimiititaliap isumaliutissiissummini erseqqissarpaa. Tassa imaappoq, sanaqataasoq illumini najugaqarpat taannalu aserfallatsaaliorlugu, taarsigassarsiat sanaqataasup utertillugit akilersornagit, sanaqataasup taarsigassarsiai ukiut 20-t ingerlaneranni annikilliarortartut, erseqqissarneqassasoq.

Ataatsimiititaliap aamma erseqqissarpaa, siusinnerusukkut nammineq illuliornermut aaqqissuussinermi illut arlallit sananeqarnerat naammassineqarsimannigitsut. Tamanna tunngavigalugu ataatsimiititaliap inassutigaa, illut allanut tunniunneqarsinnaanerannut periarfissaqarnera pillugu isumaliutersuuteqarnerit, inissianut aningaasalersuinermit aaqqissuussinerit nalilivigineqarneranni ilaatinneqartariaqartut. Tamanna maannakkut sanaqateqarluni illuliat pillugit inatsimmi maannakkut atuuttumi atuutereerpoq, tamatumalu atuutiinnarnissaa Naalakkersuisut isumaqatigaat.

Kiisalu atugassarititaasunut piumasaqaatinut tunngatillugu sanaqateqarluni illunut qinnuteqartut qanoq naligiissinneruneqarsinnaanerit pillugu Naalakkersuisut aaqqissuussinermik naliliinermi isumaliutersuuteqarnissaat ataatsimiititaliap kissaatigaa.

Immersuinerit attuumassutillit tamarmik ilanngunneqarnissaat, aammalu ineqarnermut suliaasaqarfimmi atituumik isumaqatigiissuteqarnissaq, Naalakkersuisut pingaartippaat, ilanngullugu aamma inissianut aningaasalersuinerit suliaasaqarfik. Taamaattumik Naalakkersuisut taakkua naliliinissamut kiisalu aqqissuussinerit naleqqussarneqassappata, tusaatissatut tigussavaat.

Naliliinerup inernissai aammalu Inatsisartuni partiit suleqatiginerisa ingerlaqqinnissaa, qilanaaraakka. Ineqarnermut suliaasaqarfimmi anigorniagassat aqqiivigineqarnissaat pillugu suleqatigiinnissarput pisariaqarpoq, ilanngullugu inoqarfinni minnerusuni inissaaleqineq, taakkunani nammineq illuliornermut aqqissuussineq aqqiissutissat ilaannut iluaqutaasinnaalluni.

Taamatut oqaaseqarlunga Naalakkersuisut sinnerlugit inassutigaaara siunnersuut akuerineqassasoq.